


ТЕМУРБЕК ПОЁНОВ

ҚУЁШЛИ
ТОНГ
ШЕЪРЛАР

Тошкент
«Янги аср авлоди»
2006

84(59)6-5 438.824, 2426. —
Шеърлар

«Қуёшли тонг» беғубор туйғулар гулдастаси, ёш қалбнинг кечинмалари мажмуасидир. Ҳаётни болаларча бокира идрок этиш шеърларга айрича руҳ бағишлаган. Содда, дилга яқин мисралар ўзларида илиқлик татийди. Бугунги кун ёшларининг ажиб дунёси, сирли олами, орзу – умидлари, интилишлари сатрларда жонланиб, диққатни жалб этади.



ISBN 5-633-01849-6

© Темурбек Поёнов. «Қуёшли тонг».

«Янги аср авлоди», 2006 йил

ИЖОД ОСТОНАСИДА

Муҳитнинг тарбия ва ижодга таъсири катта бўлиши исбот талаб қилмайдиган ҳақиқатдир. Темурбек ҳали мактабга қатнамай савод чиқарган эди. У китоблар ичида ўсди. Бобоси, адабиётшунос ва тарихнавис олим Поён Равшановнинг шахсий кутубхонасида бир олам китоб мавжуд. Набиранинг ижод сирларини эрта англашида ҳам оилавий ҳаёт равиши ўзига хос аҳамият касб этган.

Темурбек эндигина 12 ёшга тўлди. У Қарши шаҳридаги Муқимий номли мактабнинг 7-синфида таҳсил олаётир. Дарсларни аъло даражада ўзлаштиради, инглиз тили бўйича сабоқ олади. Компьютерни ҳам жуда яхши эгаллаган.

«Қуёшли тонг» тўплами Темурбек Олимжон ўгли Поёновнинг учинчи китоби. Бунга қадар у «Темурбек эртаклари» ва бобоси билан ҳамкорликда «Нахшаб қиссаси» китобларини нашр этдириб улгурган эди. Унинг биринчи машқлари эртаклардан иборат эди. Эртақлар болаликнинг сеҳрли олами ўларок, жуда кичик ёшдан уларни ўзига жалб этади. Темурбек яхшилик ва ёмонлик тафовутини эртақларни ўқиб англаган. Дўстлик, билимнинг кучи, одоб ва тарбиянинг аҳамияти сингари мавзуларда болаларча бийронлик билан фикр юритади. Ҳозирги болаларимизнинг

дунёқараши, ҳаёт ҳақидаги тушунчаси ҳайратомуз тарзда теран, десак янглишмаймиз. Темурбекнинг шеърларида ҳам шундай хулоса чиқаришимизга имкон берадиган жиҳатлар кўп.

У ўзининг дастлабки назмий тўпламига илк машқлари намуналари билан бир қаторда, бадний жиҳатдан анча пишиқ бўлган шеърларини ҳам киритган. Оила давраси, синфдошлар, шаҳар ва қишлоқлар билан боғлиқ шеърларида мурғак тасаввурнинг бадний ифодаси ўз аксини топади.

Темурбекнинг шеърлари самимий ёзилган. У очик кўнгиллик билан кўлга қалам олади. Яхшиликни, тўғрилиқни, меҳнатсеварликни ёқлайди, аксинча, дангасалиқни, ишёқмасликни, бир сўз билан айтилса, ёмонликни иллат деб тушунади.

Асримиз бемисл илм-фан тараққиёти билан тавсифланади. Темурбек шеърларида билим ҳақида алоҳида бир жўшқин талқин кўзга ташланади. Бу мавзудаги сатрлар анча мукамал. Унинг ўзи ҳам билимга чанқоқ, тил ўрганишга иштиёқманд. Ўзидаги яхши сифатларни шеърга солишга интилишни кутлаш жоиз.

Темурбек ижод остонасида турибди. Билим ва ижоднинг йўли олис ва машаққатли. Бу борада унга матонат, қатъият, омадлар ёр бўлаверсин.

Амир Худойбердиев,
шoir

БОБОЖОНГИНАМ

Биз бир-биримизга керакмиз!

Суянган тоғимиз, бобожонгинам,
Сиз тамал тошимиз, бобожонгинам.
Аллоҳдан истагим сизга соғлиқдир,
Эй, қарвон бошимиз, бобожонгинам.

Йил, ойлар утади, бобожонгинам,
Яхшилик кутади, бобожонгинам.
Китоблар ёздингиз, авлодлар бир кун,
Гулдаста тутаяди, бобожонгинам.

Омад берсин ишга, бобожонгинам,
Омон бўлинг бошга бобожонгинам.
Толманг мудом қилинг ижод, илму фан,
Қарамайин ёшга, бобожонгинам.

Қалбимда ҳаяжон, бобожонгинам,
Юринг доим омон, бобожонгинам.
Сиз олим, ёзувчи Поён Равшансиз,
Ардоқласин замон, бобожонгинам.

Йиллар кечар шитоб, бобожонгинам,
Битинг кўплаб китоб, бобожонгинам,
Сиз ибрат, ўрнаксиз, олижанобсиз,
Яхшиликка хитоб, бобожонгинам.

УМИДЖОН

Умиджон хотирасига

Умиджон, хотиранг ўчмас, эсимда,
Шўх-шўх кулишларинг сўнмас, эсимда,
Ўйнардим сен билан таътил чоғларда,
Умрингнинг гуллари сўлмас, эсимда.

Ота-онанг йиғлаб айрилди сендан,
Момонг нолон, бўлди жигари хундан.
Синфдош дўстларинг ҳам қилдилар фиғон,
Йўқотиш бормидир оғирроқ бундан.

Умид билан тилаб олганди отанг,
Еру кўкка ишонмасди-ку онанг.
Сув балоси ногоҳ ямлади, эй воҳ,
Мотамга чулғанди бир зумда хонанг.

Кабутар бўлиб учдинг-а, Умиджон,
Жаннатдан макон кучдинг-а, Умиджон.
Орзуларинг бор эди олам-жаҳон,
Армон-ла кўчдинг-а, Умиджон.

Сен нур бўлиб тўлдинг оламда, жигар,
Ялт этиб ярқираб кулдинг оламда, жигар.
Хотиранг ўчмайди, қалбдасан абад,
Васфинг битди Темур қаламда, жигар.

* * *

Туғилган куним бугун,
Ҳамма менга парвона.
Момом, бобом қутлади,
Укаларим ҳам яна.

Отам совға келтирди,
Онам шу кун қучогим
Даста гулга тўлдирди,
Чоғ бўлдида димоғим.

Яхшида туғилган кун,
Дастурхон бўлар тўкин.
Танбеҳ ҳам эшитмайсан,
Фақат тез ўтар лекин.

* * *

Бобом менга бахт тилар,
Доим ёнимда бўлар.
Тарихни яхши билар,
Насиҳатлар кўп қилар.

Мени севгучи бобом,
Ҳам қадрловчи бобом.
Ўргатар ижод сирин,
Меҳнат қилгучи бобом.

Менинг севимли бобом,
Тўғри йўлни кўрсатар.
Ушбу шеърин Темурбек,
Унга бахшида этар.

Бор эканда йўқ экан,
Қадим ўтган замонда,
Мағриб деган томонда,
Шаҳзода бўлган экан.

Бечора сифат экан,
Меҳнати роҳат экан.
Шаҳзода бўлса ҳамки,
Хислати тоқат экан.

У жуда кўркам экан,
Нозик суҳандон экан.
Қалб тўла илҳом экан,
Кучи ҳам чандон экан.

Атрофи зулмат экан,
Саройи кулфат экан,
Шаҳоншоҳ ота эса,
Зулм ила улфат экан.

Ниҳоят бир кун келиб,
Шаҳзода тугён қилиб,
Зулматга боқиб дадил,
Ташлабди уни тилиб.

Золим ота ҳайрондир,
Тахти бўлса вайрондир.
Адолат талаб ўғли,
Зукко, соҳиб даврондир.

Офият етмиш элга,
Кувончлар тушмиш дилга,
Бадар кетмиш шаҳоншоҳ,
Илм ёйилмиш ўнг-сўлга.

Бошқарса давлатни илм,
Кўтарилар элдан зулм.
Гуллаб-яшнар мамлакат,
Устун бўлар одоб, ҳилм.

Неча йиллар осойиш,
Элда бўлмиш барқарор.
Одамлар тинч, йўқ койиш,
Ҳамма шаҳзодин алқар.

ҚИШЛОҒИМ

Шаҳардан олисда бобом қишлоғи,
Таътил чоғларида бораман яйраб.
Ёқади узуми, қаймоқ, пишлоғи,
Қушлар ҳам қувнайди боғларда сайраб.

Қишлоқнинг ҳавоси мусаффо, тоза,
Ариқ суви зилол, чўмилсанг маза.
Тўрт томонга боқсанг яшнаган дала,
Қовун-тарвуз, макка, гуллаган ғўза.

Одамлар меҳмондўст, кўнгиллари кенг,
Дастурхон ёзарлар, деб "олинг, енг-енг".
Фермерлар бошлиғи Ғайрат амаким,
Меҳнатдан толиқмас раҳбарлардан денг.

Тепаликлар – қадим манзиллар бунда,
Ҳайбатли кўринар айниқса тунда.
Равшан бобом руҳи бўлғай намоён,
Ҳар уйда порлаган чироқ-ёлқинда.

Қишлоқни севаман бобомлар ҳақи,
Тилагим, камолди, ривож, равнақи.
Меҳнаткаш, бағрикенг эли бор бўлсин,
Темурбекникидир Байрам қишлоғи.

* * *

Ҳаёт бахшида этган,
Отажонимга раҳмат.
Оқ сут бериб ўсдирган,
Онажонимга раҳмат.

Яхши тарбият қилган,
Бобожонимга раҳмат.
Оқ-қорани билдирган,
Моможонимга раҳмат.

Билим берган муаллим,
Устозларимга раҳмат.
Нурафшон қилган йўлим,
Юрти элимга раҳмат.

Озод, ҳур ватанимиз,
Мустақиллик барқарор.
Сақлагаймиз эркимиз,
Тилда шукрона такрор.

Муҳайё ҳамма имкон,
Ушалади тилаклар.
Ўқимоқ керак экан,
Шимарилган билаклар.

ИККИ ОПАМ

Амакимнинг қизи бор,
Менга севимли опа.
Туради эрта наҳор,
Дейди тонгда кўр сафо.

Уйғотади мени ҳам,
Сал ёқмайди шу иши.
Кўймайди гар турмасам,
Мумкин эмас чалғиши.

Синглиси унинг Гўзал,
Худди мендай дангаса.
Буниси тескари ҳол –
Куни бўйи ухласа.

Яхши опанг бўлгани,
Сабаб борда тургани.
Иккаласи ҳамжиҳат,
Саришталик қилгани.

Дилбар опам ўқийди,
Гўзал эртак тўқийди.
Саранжомлаб ишларин,
Улар гулга сув қуйди.

Иноқмиз ука-опа,
Бўлмасмиз ҳеч бир хафа.
Ухлашга чора топа –
Қутилганман кўп дафъа.

МУСТАҚИЛЛИК ДАРСИ

Дарсни бошлаб, муаллим сўрар;
– Қани, кимлар уйда қуш боқар?
Уч-тўрт бола ўрнидан турар,
Жавоб учун қилишиб қарор.

– Бизда каклик, канарейка бор,
Сўз бошлайди ортдан Ҳафиза.
– Сайрашади гарчи қафас тор, –
Дейди Нодир, – эшитсанг маза.

Жиддий тортиб шунда муаллим,
– Қафас эркин бўғади, – деди, –
Халқимизнинг тарихи қадим,
Туркий давлат барқарор эди.

Соҳибқирон Темур бобомиз,
Довруғимиз ёйди жаҳонга.
Етти иқлим унга чўкди тиз,
Даъф айтди насли Чингизхонга.

Кечди замон, бўлди айрилиш,
Парчаланди буюк мамлакат.
Оғир жуда йўлдан қайрилиш,
Туркистонни қучди ҳалокат.

Бўлингани бўри ейди, рост,
Осонгина босиб олди ёв.
Мутелиқда қисқа эди даст,
Гарчи эрк деб тикилса-да дов.

Қафас ичра эди халқимиз,
Қирқилганди эркнинг қаноти.
Истибдоднинг нафасидир муз,
Яқин кечмиш бунинг исботи.

Тўқсон биринчи йил, биласиз,
Озодликка етди она-юрт.
Сентябрни байрам қиласиз,
Яшнаб ватан, эл, дала-сирт.

Болажонлар, озодлик неъмат,
Курашларда тўкилган қонлар.
Истиқлолни тутинг ҳанимат,
Қурбон бўлган фидойи жонлар.

Мустақиллик фарзанди сизлар,
Озод ватан дилбанди сизлар.
Порлоқ бўлар нурафшон эрта,
Хурриятнинг пайванди сизлар.

Қафасда қуш сайрай олмайди,
Қанот ёзиб яйрай олмайди.
Боғ, ўрмонга интилар мудом,
Олтин бўлсин қафас, қолмайди.

Кимсалар бор эркини кўролмас,
Қора ният, мақсади ғараз.
Тўғри йўлдан бизни буролмас,
Ватанфуруш ҳар қандай мараз.

Мустақиллик қадрин билайлик,
Ватан учун фидо бўлайлик.
Халқ тарихин севиб ўрганиб,
Озод юртда ўйнаб-кулайлик.

Ҳа, болалар, Ватан, истиқлол,
Миллат эрки ниҳоят азиз.
Мустақиллик ор-номус, иқбол,
Буни онгга қуйиб олинг сиз.

* * *

Ҳамма фанлар кизик ва яхши,
Мустақиллик дарси бошқача.
Эркиннг қадрин тутайлик баланд,
Ватандошлар – қари-ёшгача.

СИНФДОШ ҚИЗЛАР

Синфдошдир йигирма қиз,
Оқила ҳам ширин сўз.
Чиройлидир исмлари,
Бари барно, қоракўз.

Аълочидир дарсда улар,
Меҳнатни ҳам билиб қилар.
Тозаликни жондан суяр,
Ишларидан кўнгил тўлар.

Қолишмайди спортда ҳам,
Орасида дангаса кам.
Баскетболни қойил қилар,
Юраклари тўла илҳом.

Айтишади шеърлар жўшиб,
Сатрларга оҳанг қўшиб.
Тан берасан, дўст, сен ҳам,
Улар қолса рақсга тушиб.

Иноқ улар, дугона,
Мактабдачи ягона.
Ҳавас билан боқибоқ,
Муаллимлар парвона.


Гулноз жуда шиддатли,
Ҳалима қалби ўтли.
Назокат кўп хаёли,
Раъно сўзлари тотли.

Чакқон, зийракдир Дилбар,
Қизларгадир у раҳбар.
Ҳақини олар биров
Шилқимлик қилса агар.

Синфдошдир йигирма қиз,
Биз ўғиллар иноқмиз.
Қийин дарслар бўлганда,
Ёрдам сўраб турамиз.

Баъзан ҳазил қиламиз,
Сочларин боғлаб қўйиб.
Сўнг балога қоламиз,
Койиш эшитиб тўйиб.

Йигирма қиз, ўн ўғил,
Доим бирдир сўзлари.
Тотув бўлсак биз албат —
Келажак юлдузлари.



ТЎРТЛИКЛАР.

Абадий эмасдир қувонч, олқишлар,
Яхшини четласин ўкинч, қарғишлар.
Ёлғоннинг, бўҳтоннинг умридир қисқа,
Мақтовда ҳам бўлар баъзан чалғишлар.

* * *

Анов бола ўзин ҳисоблар ботир,
Кичикларни кўрса дейди ўтир – тур.
Сўрсангиз бир китоб ўқидингми деб,
Билинар билимда эканлиги фўр.

* * *

Аслида фидоий инсондир дилсўз,
Яхшилиқ-ла бир тан, бир жондир дилсўз.
Ўзгалар бахтини ўйлайди ёниб,
Шу хислати сабаб омондир дилсўз.

* * *

Баҳор келиб тўлди анҳор сойлар, ҳей,
Дала-даштга чиқинг болақайлар, ҳей.
Табиат афсунгар, яшарар олам,
Гул билан тўлади қуруқ жойлар, ҳей.

* * *

Баҳор ўтар, ёз, куз ҳам ўтади,
Қиш қаҳратони, муз ҳам ўтади.
Қуёш чарақлаб турсин оламда,
Кўпайиб бир кун оз ҳам ўтади.

* * *

Бахтни кўмсаб яшагувчилар кўп,
Ёмонлик истар каслар ҳам тўп-тўп.
Насиба етар ниятга лойиқ,
Тарбия олган бўлажакдир хўб.

* * *

Баъзилар бор жуда бадфеълдир,
Кўпларда яхши хислат мўлдир.
Ёмонлик сабаби жоҳиллик,
Мумкиндир, элни илмга тўлдир.

* * *

Беғубор юракка гулгула солма,
Яхшилик қилишдан тўхтама, толма.
Ёшлиқдан билимнинг қадрига етгил,
Жоҳиллик заволдир, охири ғалва.

* * *

А. Алиқуловга

Бизларга билимни ўргатган устозим,
Бу йўлда машаққатлар тотган устозим.
Хорижий тил сирин билмоқлик мушкулдир,
Меҳнат-ла муддаога етган устозим.

* * *

Боланинг орзуси баркамол ўсиш,
Эртанги кунини чароғон кўриш.
Бўлмасин ҳеч қачон йўлини тўсиш,
Насиб этсин унга иқболга етиш.

* * *

Бойинган кимсалар танимас одам,
Ҳавоси бўлакча, бошқача қадам.
«Дунё топган тентакдайин» нақли бор,
Ақлини йўқотмасин ҳеч ким – муддаом.

* * *

Бўривой бўлса овқатга ўч,
Ҳам оғзидан тушмайди сақич.
Папкасида турли хил холва,
Бири юмшоқ, биридир сўрғич.

* * *

Данғиллама уйлар ҳувилламасин,
Шамол эшик очиб увилламасин.
Бахтиёр яшасин соҳиб иморат,
Омад орқасида имилламасин.

* * *

Дунёда Равшан бобомдек инсон йўқ энди,
Яхшилиги қолди абад, сўзим уқ энди.
Фарзандлар ўрнин босарлар, набиралар ҳам,
Шуларни ўйласам кўнглим бўлар тўқ энди.

* * *

Душманинг ичида бўлгин сен,
Дўстингинг ёнида кулгин сен.
Оқ-қора фарқини билгин сен,
Сўнг яшарсан гулгун сен.

Дўстинг қилса хиёнат – ёмон,
Гар қайтмаса омонат – ёмон.
Ишонч боғлаб адашма, Темур,
Хешинг қилган зиёнат – ёмон.

Ҳали хатоларга қўл урганим йўқ,
Таълим-тарбиядан юз бурганим йўқ.
Яхши нима, ёмон нима ўргатинг,
Ёшман жуда, ҳеч нарса кўрганим йўқ.

Ҳаммадан қолар дунё эмиш,
Бу ҳикматни боболар демиш.
Қийин экан, дўстлар, маъноси,
Ўйлаб-ўйлаб бўласан хомуш.

Ҳавасим келади Акмалга,
Одобли, билимли ҳам кучли.
Шу дўстим етади камолга,
Бўлар албат ватанга бурчли.

(Ҳазил)

Илҳом келар тонгда, эрталаб,
Уйқу енгар жангда, эрталаб.
Иссиқ кўрпам олғай бағрига,
Афсус, ҳолим тангда, эрталаб.

* * *

Ишончни оқламас дўстинг бўлолмас,
Ҳеч қачон офиринг енгил қилолмас.
Лафзингга эга бўл, сўз берсанг агар,
Бетайин – кимсалар ўйнаб кулолмас.

* * *

Жамшидвой ўзи бир мишиқи,
Гердаяди қизлар олдида.
Тунов куни дарсда билмайин,
Оғайним уётга қолди-да.

* * *

Жўралар ҳеч уф тортманг,
Қийин дамлар ўтади.
Бир нарсани унутманг,
Ватан бизни кутади.

* * *

Келажак, келажак, нурли келажак,
Эртага кечадан яхши бўлажак.
Бугуннинг ёшлари ғайрат қилажак,
Ватан обод бўлиб иқбол кулажак.

* * *

Кўчага маюс боқаман,
Хаёлга чечак тақаман.
Эзилиб ёғади ёмғир,
Мен томчиларда оқаман.

* * *

Лазизбек синфдош Маъмурбек билан,
Ораларидан қил ўтмас қалин.
Ким зўр дебон баҳс ҳам боғлашар,
Курашда билар бир-бирин ҳолин.

* * *

Мақтанчоқдан ҳали олим чиққан эмас,
Уринса-да хасис дунё йиққан эмас.
Бобом деди, «улкан бойлик – билим, Темур,
Донолардан зўрни она туққан эмас».

* * *

Майин тушар осмондан қорлар,
Ер юзасин безайди зарлар.
Оқ либосга бурканар дунё,
Энг муҳими, кувнар болалар.

* * *

Мағрурман ортимда дўстларим турса,
Хафаман борди-ю бири юз бурса.
Бир-бирига керак одам боласи,
Қани барча дўст бўлиб даврон сурса.

* * *

Меҳмонмиз дерлар дунёда,
Келиб-кетар экан ҳамма.
Бирон из қолдирсак зора –
Шу бўлсайди бош муаммо.

Меҳнат қилиб толмай ишлар Зоҳид акам,
Ризқ йўлида хормай ишлар Зоҳид акам.
Ғалласи, пахтаси, бугдой, чорваси кўп,
Сира камлик кўрмай ишлар Зоҳид акам.

Меҳнат қил белинг чиниқсин,
Толма ҳеч, кўлинг чиниқсин.
Яшаш шунда бўлар осон,
Машаққатда йўлинг чиниқсин.

Менинг шўх укажоним Маъмурбек,
Ўйинқароқ, лекин ақлли жуда.
Дарс қилар, велик ҳайдар, тинмас лек,
Вақтини кетказмайди беҳуда.

Мозийни ўрганиб келдим бобом ёнига,
Билимни ўрганиб келдим отам ёнига.
Англадим, ҳаёт кураш экан, илмли қолиб,
Одобни ўрганиб келдим онам ёнига.

Муаллим дилимда, унут бўлмайди,
Муаллим элимда унут бўлмайди.
Зимзиё оламини ёритгувчи ул,
Муаллим тилимда, унут бўлмайди.

Мурғак тасаввурга сиғмаган олам,
Денгизлар, уммонлар, қитъалар, тоғлар...
Ҳаммадан, дейдилар, мураккаб одам,
Гоҳ бузади, гоҳо яратар боғлар.

Мусулмонмиз, динимиз ислом,
Тотувликдир аввалги калом.
Одоб-ахлоқ, билимдир шиор,
Яхшиликка бергаймиз салом.

«Нахшаб» қадим шаҳримнинг номи,
Насаф эрур унинг давоми.
Уч минг йилга етади ёши,
Ҳозир «Қарши» унинг мақоми.

Нима керак яна сенга, эй ўртоқ,
Истеъдод етарли, чиройли хатинг.
Саводинг мақталар мактабда ҳар чок,
Машҳур бўлмоғи керак энди отинг.

Оллоҳимга айтай ҳамду санолар,
Ўқимокда кўп экандир маънолар.
Тил ўргансанг дунё яна кенгаяр,
Билим сабаб бунёд топар бинолар.

* * *

Оллоҳим мурғак қалбим ғуборсиз,
Чаманда битмас экан гул хорсиз.
Тўғри йўл кўрсат болалик чоғдан,
Улғайиб яшай фароғда, зорсиз.

* * *

Олтин куз неъматин аямас биздан,
Боғ аро бораман сўқмоқдан, издан.
Ғарқ пишган олмалар, узум, мевалар,
Мамнунлик туяман ризқ-рўзимиздан.

* * *

Оғир дардга чалиниб ётибди дўстим,
Бир мададга илиниб ётибди дўстим.
Дунё кенгдир болалар ўйнасин, кулсин,
Синфда ўрни билиниб ётибди дўстим.

* * *

Пасткашлик ёмон иллат,
Ёнига йўлай кўрманг.
Тубандан етар кулфат,
Қозонга яқин турманг.

* * *

Қарсак икки кўлдан чиқади, дерлар,
Умид дарё бўлиб оқади, дерлар.
Ҳаётда интилиш яшаш тамали,
Қуш ҳам кўкда қанот қоқади, дерлар.

Қарши она шаҳримдир,
Ёши ниҳоят улуг.
Икки минг етти юз йил –
Тарихи эрур қутлуг.

«Қоравулбеги қисматин»¹ ўқидим, маҳзун,
Боболар ўтмишда ноҳақликдан чекмиш ун.
Оғир замонлар кечибди бизгача қанча,
Мозийга қиёс – билсак мустақиллик қадрин.

Саксондан ошган ул моможоним бор,
Дуогўй, меҳрибон, дили беғубор.
Ўн фарзанд ўстирган, элда эътибор,
Набиралар ёнда туришар қатор.

Стол устига қўйдим қаламим,
Чархлаб учин йўндим, қаламим.
Ҳавас қилдим бобом ишига,
Ижод завқин туйдим, қаламим.

¹ Бобомнинг шу номдаги китоби – Т.П.

* * *

Сумалак қозонда бир кун қайнади,
Тагидан жавоҳир тошлар чиқади.
Албат яхши ният қилинг болалар,
Чун, ёмонни Наврӯз руҳи йиқади.

* * *

Тердим даста атиргул,
Хушбўй бўлди ўнг-у сўл.
Завқ бағишлар чиройи,
Ҳаёт гўзал, ўйнаб-кул.

* * *

Тиниб-тинчимас инсонлар кўп,
Яхши ниятли, ишлари хўб.
Болажондир ҳамда оқ кўнгил,
Юргим уларга ҳавас қилиб.

* * *

Тонгда туриб сокин осмонга боқдим,
Хаёл дарёсида чўмдимда, оқдим.
Қуёш кўтарилиб келар чароғон,
Нурга қонмоқ бўлди муддаом, аҳдим.

* * *

Тут баргисиз пилла бўлмас,
Нон пишмаса ялла бўлмас.
Китоб билан олам равшан,
Ўқимаган мулла бўлмас.

* * *

Тўполон, гердайиш Акмалга ҳунар,
Оғзида сақичи, пуфлаб шиширар.
Безиллаб қолибди ҳамсабоқ қизлар,
Билим уни албат шаштдан туширар.

* * *

Уммон узра қалқир бир кема,
Заррамидир, билмам, у нима?
Борар тоғдай тўлқинлар ошиб,
У журъатдир, ҳеч зарра дема.

* * *

Устоз менга таълим берган,
Китоб эса билим берган.
Алифбо ҳам муаллимим,
Ҳаётдаги йўлим берган.

* * *

Ватан деб боболар жондан кечганлар,
Эркин деб оталар шонни қучганлар.
Уларнинг йўлидир авлодга ибрат,
Аждодлар қонлари танга кўчганлар.

* * *

Тўлқин амакимга

Яхши инсон эзгу ниятга етар,
Омад кулса дилдан ғуборлар кетар.
Обрўси ошади, иши беш бўлар,
Келажак ардоқлаб гулдаста тутар.

* * *

Ёмонлик келади асли ёмондан,
Ўқ отилади эгри камондан,
Улуғлар китобин ўқидим, уқдим,
Пасткашлик кутилмас яхши томондан.

* * *

Ёмғир шовуллаб ёғди,
Юзин чайди она-Ер.
Қиёси йўқ бу чоғни,
Табиат берди сурур.

* * *

Зерикарли бўлар баъзида дарслар,
Руҳлантирар яхши гап ҳамда «қарс»лар.
Керак экан одам бир-бирига, эҳ,
Ёниб турсин юракда эҳтирослар.

* * *

Ўзи йўқ – у номи бор,
Ваҳимали дами бор.
Эртакдаги аждаҳо,
Яна нима ками бор.

МУНДАРИЖА

<i>А.Худойбердиев. Ижод остонасида</i>	3
Бобожонгинам	5
Умиджон	6
«Туғилган куним бугун...»	7
«Бобом менга бахт тилар...»	7
«Бор эканда, йўқ экан...»	8
Қишлоғим	10
«Ҳаёт бахшида этган...»	11
Икки опам	12
Мустақиллик дарси	13
Синфдош қизлар	16
Тўртликлар	18

Адабий-бадиий нашр

ТЕМУРБЕК ПОЁНОВ

ҚУЁШЛИ ТОНГ

Шеърлар

Муҳаррир А.ХУДОЙБЕРДИЕВ

Бадиий муҳаррир Б.БОЗОРОВ

Техник муҳаррир Е.ДЕМЧЕНКО

Мусахҳиҳ Н.ЖАББОРОВА

Компьютерда саҳифаловчи Ф.БОТИРОВА

ИБ № 4146

Босишга 14.02..2006й да рухсат этилди. Бичими 70x84 1\32.

Босма тобоғи 1,0. Шартли босма тобоғи 1,68.

Адади 1000 нусха. Буюртма № 28.

Баҳоси келишилган нархда.

«Янги аср авлоди» нашриёт-матбаа марказида тайёрланди.

«Ёшлар матбуоти» босмахонасида босилди.

700113. Тошкент, Чилонзор-8, Қатортол кўчаси, 60.